



2014: GODINA SAZRIJEVANJA

Godišnji izvještaj o radu Sarajevskog otvorenog centra

SOC UKRATKO

Sarajevski otvoreni centar (SOC) zagovara puno poštovanje ljudskih prava i društvenu inkluziju LGBT osoba i žena.

Sarajevski otvoreni centar je nezavisna, nestranačka, neprofitna ekspert-ska organizacija koja teži osnažiti LGBT (lezbejke, gej, biseksualne i trans*) osobe i žene kroz jačanje zajednice i građenje pokreta. Sarajevski otvoreni centar, takođe, javno promoviše ljudska prava LGBT osoba i žena, te zagovara unaprjeđivanje zakonodavstva i bolje politike u Bosni i Hercegovini na državnom, evropskom i međunarodnom nivou. Kroz rad na pitanjima ljudskih prava uopšte, unaprjeđenja pozicije civilnog društva i evropskih integracija, Sarajevski otvoreni centar doprinosi i drugim ljudskopraškim temama.

Sarajevski otvoreni centar osnovan je 2007. godine, a 2011. započinje faza profesionalizacije organizacije. Danas, sa svojih 12 članova/ica tima, upravnim odborom, osnivačima/cama, aktivistima/cama i intenzivnom partnerskom mrežom u BiH i širom Evrope, organizacija je prepoznata kao jedan od ključnih aktera bosanskohercegovačkog civilnog društva u oblasti prava LGBT osoba i žena.

Sarajevski otvoreni centar
Čekaluša 16
BiH-71 000 Sarajevo



+ 387 (33) 551 000 (programski tim)

+ 387 (33) 551 001 (rukovodstvo, finansije i administracija)



+ 387 (33) 551 002

www.soc.ba - office@soc.ba

www.lgbt.ba - www.zenskamreza.ba - www.eu-monitoring.ba

SADRŽAJ

Pozdravna riječ	4
2014: GODINA SAZRIJEVANJA	
Programi	
Prava LGBT osoba	6
Prava žena	9
SOCplus	11
Komunikacije	
Komunikacijske platforme i mediji	12
Proizvodnja znanja: SOC izdavaštvo	13
Razvoj organizacije i finansije	14
ŠTA NAM DONOSI 2015?	17
Drugi/e o nama	19
Tim	20

Kada smo 2011. godine počeli/e profesionalizirati svoj rad i istom počeli/e davati profil, nismo mogli/e ni pretpostaviti da će se Sarajevski otvoreni centar razviti u ovom pravcu i imati današnju poziciju. Dok su 2011, 2012. i 2013. bile godine odrastanja i dinamičnog razvoja, za 2014. možemo reći da je bila godina sazrijevanja i stabilizacije. Razvijali/e smo se kao članovi/ice organizacije, ali su se razvijali i naši programi. Sazreo je i jasan profil organizacije, koji je prepoznala zajednica sa kojom radimo, kao i mediji, ali i bh. i međunarodni akteri. Sarajevski otvoreni centar je tako postao jedan od ključnih aktera bh. civilnog društva u oblasti prava žena i prava LGBT (lezbijki, gej, biseksualnih, i trans*) osoba, što pred nas postavlja velika očekivanja. Nadamo se da ćemo ih i opravdati.

Iako je 2014. godina bila još jedna od onih izbornih godina *koju su pojeli skakavci*, gdje je praktično bilo nemoguće doći do značajnih promjena na nivou javnih politika i provedbe istih, trudili/e smo se da to ne utiče na naše programe. Na ovom mjestu ćemo istaći tri centralna dostignuća. Izrazito smo ponosni/e što smo bili/e dio permanentne obuke za, otprilike, 1300 policajaca/ki u Kantonu Sarajevo, koji su dobili informacije o problemima s kojima se suočavaju LGBT osobe kada je riječ o nasilju i krivičnim djelima počinjenim iz mržnje. Oktobarske izbore smo iskoristili/e kako bismo ojačali/e svoj višegodišnji angažman u oblasti političke participacije žena i ravnopravnosti spolova, te tako otvorili/e put za radikalnije zagovaranje novih rješenja koje će uslijediti 2015. godine. Prošle godine smo, takođe, preuzeli/e i koordinaciju Inicijative za monitoring evropskih integracija BiH, te kroz kontinuiran rad, naročito objavljivanjem *Alternativnog izvještaja o napretku*, postavili/e se kao relevantan sagovornik, kada su u pitanju ljudska prava i EU integracije.

Na organizacionom nivou, 2014. godina je donijela dvije bitne novine. U 2014. usvojili/e smo novu organizacionu *Strategiju za period 2014-2017*. Krajem 2014. uspjeli/e smo dobiti i institucionalnu podršku za narednih nekoliko godina. Švedska međunarodna razvojna agencija (SIDA) i Fond otvoreno društvo BiH (Inicijativa za ljudska prava Fondacija za otvoreno društvo) postali su naši novi/stari partneri i pokazali da, zajedno sa našim projektnim donatorima i partnerima, vjeruju da radimo kvalitetno i ispravno, te da zaslužujemo podršku.

Radujemo se vašim komentarima.

Saša GAVRIĆ, izvršni direktor
Emina BOŠNJAK, rukovoditeljica programa



Art kino Kriterion, Međunarodni festival queer filma *Merlinka*, Sarajevo, februar 2014.

PRAVA LGBT OSOBA

U okviru svoga rada na pravima LGBT osoba, Sarajevski otvoreni centar ima tri težišta.

Socijalna i pravna podrška LGBT osobama i izgradnja aktivističkog pokreta

Prepoznavajući lične potrebe LGBT osoba, kao i činjenicu da im državne institucije ne pružaju potrebnu podršku, težište rada stavljamo na socijalno i pravno osnaživanje. Vjerujemo da bez osnažene LGBT zajednice, nijedna LGBT osoba neće moći ostvariti svoja prava niti postati zagovornik/ca ljudskih prava. Mislimo da su aktivnosti u zajednici (radionice, diskusije, razgovori sa aktivistima/cama), psihološko savjetovanje, dostupnost informacija (web portal lgbt.ba), grupe podrške (aktivistička grupa, grupa Trans* BiH), te pravno savjetovanje i zastupanje temelji osnaživanja pojedinaca/ki. Dugoročni rezultat ovih aktivnosti biće osnažene LGBT osobe, koje su spremne ostvariti svoja prava pred sudskim i nesudskim organima, na taj način postajući pioniri/ke u borbi za ljudska prava ove manjinske grupe u Bosni i Hercegovini.

Povećanje odgovornosti bh. institucija za zaštitu ljudskih prava LGBT osoba

LGBT osobe su jedina društvena grupa u Bosni i Hercegovini čiji su problemi i potrebe sistematski isključene iz javnih politika, te su zbog toga neophodne nove javne politike, zakonodavne promjene i inovacije. Sarajevski otvoreni centar, zajedno sa svojim partnerima, razvija i zagovara nove prijedloge, zasnovane na konkretnim potrebama i iskustvu, s ciljem da poveća svoj utjecaj na one koji donose odluke. Znajući da politike i zakonodavstvo nisu dovoljni, radimo i sa javnim službenicima/ama (policajcima/kama, sudijama i sutkinjama, tužiteljima/kama) povećavajući njihovu svijest i znanje o kršenju ljudskih prava LGBT osoba. Budući profesionalci/ke, posebno mladi pravnici/e i novinari/ke, mogu doprinijeti ovim promjenama i zato su oni važna ciljna grupa u našem radu.


Informisanje javnosti o pravima LGBT osoba

LGBT osobe i njihovi životi još uvijek predstavljaju tabu u bh. društvu. Ciljanim akcijama u saradnji s vodećim TV, online, radio i štampanim medijima, doprinosimo pružanju vjerodostojnih informacija široj javnosti o stanju ljudskih prava i životu LGBT osoba. Takođe, koristimo umjetničke i kulturne platforme (poput *Merlinka* LGBT filmskog festivala) kako bismo osvijestili javnost o pravima LGBT osoba.

O stanju ljudskih prava LGBT osoba u 2014. saznajte u:

Rozi izvještaj. Izvještaj o stanju ljudskih prava LGBT osoba u BiH u 2014. godini, dostupan na www.soc.ba -> Publikacije -> Edicija Ljudska prava

Saznajte više o našim aktivnostima i rezultatima na www.soc.ba -> Programi



Novi pristup u direktnom radu sa LGBT osobama

Tokom 2014. godine uspješno smo intenzivirali/e naš rad sa LGBT osobama. Pored pravnog savjetovanja (online, telefonom, uživo) i specijaliziranog online-medija (www.lgbt.ba), radimo direktno sa LGBT osobama. Najmanje dva puta mjesečno organizujemo zatvorene događaje za LGBT zajednicu, informirajući, educirajući i osnažujući ih. Godine 2014. osnovane su i dvije nove grupe: SOC-ova aktivistička grupa, te grupa trans aktivista/ica Trans* BiH.

Senzibiliziranje institucija: policija, tužilaštvo, sudstvo

Iza svake promjene stoje ljudi. Kako bi LGBT osobe dobile veću institucionalnu podršku od samog početka radimo sa policajcima/kama, tužiteljima/icama i sudijama/sutkinjama. Nakon napada na Merlinka LGBT filmski festival, koji policija nije obezbjedila na adekvatan način, pokazalo se da postoji velika potreba za takvim radom. Tokom 2014. bili/e smo dio permanentne obuke za policajce/ke u Kantonu Sarajevu, educirajući više od 1300 osoba, te smo organizovali/e svoj prvi trening za tužitelje/ke, sudije i sutkinje o pravima LGBT osoba.



Merlinka LGBT filmski festival 2014

Drugom godinu za redom organizovali/e smo trodnevni vikend festival LGBT filma. Visok stepen vidljivosti u javnosti potvrdio je da naš rad ima protivnike/ce. Napad 14 huligana na goste/šće Festivala šokirao je javnost, ali je potvrdio da upravo ovakvi javni događaji jesu bitni kako bi se šira javnost upoznala sa pravima LGBT osoba.



LGBT u mainstream medijima

Tokom 2014. godine sarađivali/e smo sa svim relevantnim bh. TV, radio, online i štampanim medijima. Medijski proizvodi (emisije, serije članaka, video radovi) koji su nastali u okviru naših kampanja, doprli su do više od dva miliona bh. građana/ki, čineći tako LGBT prava izuzetno vidljivim.

Praćenje, izvještavanje, zagovaranje promjena

Tokom 2014. godine nastavili/e smo svoj zagovarački rad. Primjenjivali/e smo dobro poznat recept - pratili/e smo razvoj, dokumentovali kršenje, objavili/e rezultate u Rozom izvještaju, te razvijali/e konkretne akcije. Od Institucije ombudsmena tražili/e smo da se izradi specijalni izvještaj o stanju prava LGBT osoba, te smo prema parlamentu Federacije BiH zagovarali/e izmjene Krivičnog zakona, koje se odnose na krivična djela počinjena iz mržnje.



Jači aktivistički pokret, bolja ljudska prava

Svjesni činjenice da moramo jačati i širiti pokret za prava LGBT osoba, radili/e smo i na jačanju aktivističkih grupa u Banjaluci, Tuzli i Mostaru. Kroz seminare i ljetnu školu, ali i strateško planiranje i lokalne akcije, doprinijeli smo jačanju i decentralizaciji LGBT aktivizma, pomažući da bude vidljiviji nego ikad. Intenzivno smo doprinosili/e u organizacionom jačanju LGBT udruženja B.U.K.A iz Banjaluke.



Izložba Moja kuća je i tvoja kuća, Sarajevo, oktobar 2014.

PRAVA ŽENA

U okviru svoga rada na pravima žena, Sarajevski otvoreni centar ima dva težišta.

Povećanje odgovornosti bh. institucija za zaštitu ljudskih prava žena

Iako čine više od 50% stanovništva, žene de facto predstavljaju najveću manjinsku grupu, sistemski isključenu iz političkog i javnog, te diskriminisanu u ekonomskom životu. I pored zadovoljavajućeg zakonodavnog okvira, potrebne su dodatne javne politike, zakonodavne promjene i inovacije. Sarajevski otvoreni centar, zajedno sa svojim partnerima, razvija i zagovara nove prijedloge, zasnovane na konkretnim potrebama i iskustvu, s ciljem da poveća svoj utjecaj na one koji donose odluke. Radimo i sa samim donositeljima/cama odluka povećavajući njihovu svijest i znanje. Budući/e profesionalci/ke predstavljaju važnu ciljnu grupu u našem radu.

Informisanje javnosti o pravima žena i feminizmu

Ciljanim umjetničkim, obrazovnim i istraživačkim akcijama doprinosimo propitivanju pozicije žene u bh. društvu, ali i pružanju vjerodostojnih informacija široj javnosti o stanju ljudskih prava žena i feminizmu.

O stanju ljudskih prava žena u 2014. saznajte u:

Godišnji izvještaj o stanju prava žena u Bosni i Hercegovini u 2014. godini dostupan na www.soc.ba -> Publikacije -> Human Rights Papers

Saznajte više o našim aktivnostima i rezultatima na www.soc.ba -> Programi



Zabilježene: feministički događaj godine u BiH

Iako su žene dale veliki doprinos razvoju bh. društva, njihovo djelovanje je djelimično ili nikako vidljivo. Imajući to na umu, kao i potrebu da se na alternativni način obilježi 100 godina od početka Prvog svjetskog rata, provele/i smo veliko istraživanje koje rezultiralo knjigom pod imenom *Zabilježene. Žene i javni život Bosne i Hercegovine u 20. vijeku*, izložbom u Historijskom muzeju BiH, te regionalnom konferencijom. Nedjeljnik BH DANI proglasio je knjigu *Zabilježene* feminističkim događajem godine, na šta smo naročito ponosne/i.




Feminističko obrazovanje

Tokom 2014. godine implementirale/i smo drugi ciklus predavanja *Neko je rekao feminizam*, jedinstven bh. feministički program od osam predavanja i diskusija. 2014. godine započele/i smo i intenzivne i participativne pripreme za novi dvosemestralni obrazovni program Feministička škola Žarana Papić.

Praćenje, izvještavanje, zagovaranje promjena

Prošle godine bile/i smo jedna od najaktivnijih članica Ženske mreže BiH. Održavamo medijski nastup mreže, upravljajući i web-portalom zenskamreza.ba. Pratile/i smo razvoj oko opštih izbora te vodile/i i i/ili učestvovalle/i u zagovaranju učešća žena u izvršnoj i zakonodavnoj vlasti. Izradile/i smo monitoring izvještaj u učešću žena u politici, ali i *Godišnji izvještaj o ljudskim pravima žena*.



Ženska mreža BiH



SOCplus

Iako se u svome radu fokusiramo na prava LGBT osoba i žena, mislimo da rad organizacija civilnog društva mora uključivati i druge teme. Na taj način se može postići poboljšanje prava društvene grupe sa kojom i za koju se radi, ali se ujedno doprinosi i poboljšanju prava ostalih. Upravo zbog toga, Sarajevski otvoreni centar aktivno učestvuje u radu različitih koalicija i mreža civilnog društva, te i sam pokreće rad na određenim temama. Tokom 2014. radili/e smo na sljedećim pitanjima.

Suzbijanje diskriminacije

Prepoznavajući pitanje suzbijanja i zabrane diskriminacije kao jako bitnih, te potrebu za usvajanjem javnih politika koje bi se fokusirale na prevenciju diskriminacije, odlučili/e smo se da aktivno učestvujemo i vodimo procese vezane za izmjene zakona o zabrani diskriminacije te zagovaranje usvajanja strategije za suzbijanje i prevenciju diskriminacije. Postojeći slučajevi na sudovima pokazali su da i pored mogućnosti pokretanja parničnih postupaka, jako mali broj građana/ki se odlučuje za takve postupke. Zbog toga, potrebne su proaktivne mjere koje institucije trebaju implementirati kako bi se diskriminacije prevenirala. Tokom 2014. organizovali/e smo niz konsultativnih sastanaka sa predstavnicima/ama organizacija civilnog društva, te smo izradili/e studiju pod imenom *Usklađivanje zakona o zabrani diskriminacije BiH sa pravnom stečevinom EU*, čiji autor i autorica su renomirani pravnik i rukovodeća uposlenica hrvatskih institucija za zaštitu ljudskih prava. Na ovaj način pripremali/e smo teren za naš zagovarački rad, koji će uslijediti nakon formiranje vlasti u 2015.

Evropske integracije i ljudska prava

Sarajevski otvoreni centar je 2014. godine preuzeo koordinaciju Inicijative za monitoring evropskih integracija BiH, neformalne koalicije organizacija civilnog društva koje svojim radom žele doprinijeti praćenju evropskih integracija, ali i zagovaranju konkretnih rješenja kada su u pitanju politički kriteriji integracija (ljudska prava, vladavina prava, demokratija). Tokom 2014. radili/e smo na jačanju same mreže, što je rezultiralo *Alternativnim Izvještajem o napretku* (*Alternative Progress Report*), jačanju redovnog odnosa sa Delegacijom Evropske unije u Sarajevu, i izradom kataloga zahtjeva pod imenom *Decembarski zahtjevi*. Određeni prioriteti, istaknuti u *Alternativnom izvještaju o napretku*, preuzeti su u zvaničnom *Izvještaju o napretku*, koji je Evropska komisija objavila u oktobru 2014. godine. Inicijativu za monitoring evropskih integracija mediji i evropski partneri su prepoznali kao, korektiv kada je riječ o pitanjima evropskih integracija.

-> Više o radu Inicijative saznajte na www.eu-monitoring.ba

KOMUNIKACIJE

Transparentnost je organizacijska vrijednost Sarajevskog otvorenog centra. Uvjereni/e smo da organizacije civilnog društva imaju obavezu da izvještavaju o svome radu, i da tako doprinose mijenjanju društvene svijesti i odgovornosti.

SOC web

Sarajevski otvoreni centar održava četiri web platforme:

web stranicu organizacije - www.soc.ba,
jedini bh. LGBT info portal - www.lgbt.ba,
web nastup Inicijative za monitoring evropskih
integracija BiH - www.eu-monitoring.ba,
web nastup Ženske mreže BiH - www.zenskamreza.ba.

SOC na društvenim mrežama




Ove četiri stranice posjetilo je 120.000 posjetitelja/ica tokom 2014. godine.

SOC u medijima

Svi relevantni bh. TV, radio, online i štampani mediji izvještavali su o našem radu. Gostovali smo u jutarnjim programima i dnevnicima, davali intervjue, ali i sami pisali tekstove.

Odabrane sadržaje možete pročitati na www.soc.ba -> Press

Producirali smo, u saradnji sa partnerskim organizacijama i medijima, medijske kampanje i sadržaje koji su doprli do više od dva miliona građana/ki. Neke od njih možete pronaći na našem youtube-kanalu: <https://www.youtube.com/c/sarajevskiotvorenocentar>, koji su pregledani preko 18.000 puta.



Proizvodnja znanja: SOC izdavaštvo

Od svog osnivanja, Sarajevski otvoreni centar poznat je po svojoj intenzivnoj istraživačkoj i izdavačkoj djelatnosti. Vjerujemo da kroz proizvodnju, ali i distribuciju, znanja doprinosimo društvenim promjenama. Tokom 2014. godine, kroz naše edicije Questioning, Ljudska prava, BH politika, Gender i Human Rights Papers objavili smo 13 publikacija, sa preko 10.000 kopija.

Na naredne tri publikacije smo posebno ponosni/e:



Alternativni izvještaj o napretku 2014.

Izvještaj predstavlja odgovor civilnog društva na zvanični Izvještaj o napretku Evropske komisije, sa ciljem da pruži kritičnu i objektanu sliku trenutnog stanja ljudskih prava, vladavine prava i demokratizacije u BiH. Publikacija je rezultat rada preko 20 organizacija civilnog društva.



Rozu izvještaj.

Izvještaj o stanju ljudskih prava LGBT osoba u BiH u 2014. Četvrtu godinu za redom SOC objavljuje godišnji izvještaj o pravima LGBT osoba, jedini takav u državi. Izvještaj dokumentuje kršenja i kretanja, ali i iznosi konkretne prijedloge za unaprjeđivanje stanja ljudskih prava LGBT osoba.




Godišnji izvještaj o stanju ljudskih prava žena u BiH u 2014. Treću godinu za redom SOC objavljuje izvještaj o stanju prava žena. Po prvi put autorice su uposlenice SOC-a, na što smo naročito ponosni/e.

Sve naše publikacije možete pronaći na www.soc.ba -> Publikacije

RAZVOJ ORGANIZACIJE I FINANSIJE

2014. godina je, i u organizacionom i finansijskom smislu, bila godina sazrijevanja. Dosta energije uloženo je u izradu i usvajanje nove organizacione strategije za period 2014-2017. godina, kao i okvira za procjenu rezultata, koji sadrže teoriju promjene iza našeg rada, te 21 indikator kojim mjerimo svoje rezultate. **Strategiju i Okvir za procjenu rada (RAF)** možete downloadovati na www.soc.ba -> O nama

Primljena sredstva 2007-2014.



Ukupna sredstva na raspolaganju za 2014.


	KM	EUR
Neurošena sredstva (balans) za 2013	41.656	21.298
Primljena sredstva od međunarodnih donatora u 2014.	837.560	428.238
Primljena sredstva iz drugih izvora u 2014.	3.735	1.910
Ukupna sredstva na raspolaganju za 2014.	882.951	451.446

Naši donatori podijeljeni su u institucionalne (Fond otvoreno društvo BiH) i projektne donatore. U listi ispod navedeni su najvažniji donatori u 2014. godini.

Primljena sredstva (prilivi) u 2014.

Donatori u 2014.	KM	EUR
Norveška ambasada Sarajevo	130.113	66.526
Evropska komisija/EIDHR	114.671	58.630
Nizozemska misija pri OSCE-u u Beču	97.792	50.000
Fond otvoreno društvo BiH	86.022	43.982
Nacionalni fond za demokratiju	58.722	30.024
Civil Rights Defenders	58.676	30.000
Nizozemska ambasada Sarajevo/MATRA program	46.323	23.685
USAID Misija u BiH	46.299	23.672
Fondacija Heinrich Boell - Ured u Sarajevu	38.395	19.631
ILGA Europe	28.146	14.391
Hedda Productions/Švedski institut	26.498	13.548
Fondacija Heinrich Boell - Ured u Sarajevu/EIDHR	23.539	12.035
Fondacija Cure/Norveška ambasada Sarajevo	21.150	10.814
Mama Cash	18.580	9.450
Ambasada SAD-a Sarajevo	13.522	6.914
Švicarska ambasada Sarajevo	12.450	6.366
Urgent Action Fund for Women	7.006	3.582
Ostali međunarodni donatori	9.658	4.938
Ukupni prilivi od međunarodnih donatora	837.561	428.238
Drugi izvori/privatne donacije	3.735	1.910
Ukupni prilivi u 2014.	841.295	430.148

Potrošnja u 2014.



Neurošeni balans za 2014.

	KM	EUR
Ukupna sredstva na raspolaganju za 2014.	882.951	451.446
Ukupna potrošnja u 2014.	525.271	268.567
Neurošena sredstva (balans) za 2014.	357.680	182.879

Saznajte više o našim finansijama u **Revizorskom izvještaju za 2014. godinu**, koji je izradila nezavisna revizorska kuća NGO and Business Audit d.o.o. Sarajevo. Naše finansije su u potpunosti ocjenjene kao ispravne, u skladu sa zakonskim, donatorskim i internim propisima organizacije.

Izvještaj možete downloadovati na www.soc.ba -> O nama -> Izvještaji.

ŠTA NAM DONOSI 2015?



Feministička škola Žarana Papić

Prepoznavajući potrebu za feminističkom edukacijom i obrazovanjem nove generacije aktivistica/a, Sarajevski otvoreni centar je 2014. započeo pripreme, a 2015. i zvanično pokrenuo Feminističku školu Žarana Papić. Ovaj program nastavlja tradiciju ženskih studija, koje su vodile organizacija Žene ženama, te na taj način baštini bh. feminističku tradiciju. Kroz dvosemestralni program, polaznice/e pohađaju četiri modula, posvećena feminističkoj teoriji i praksi, te pitanjima ravnopravnosti spolova. Predavačice/i dolaze iz akademske i aktivističke zajednice, a cijeli program se završava zagovaračko-aktivističkim seminarom i konkretnim akcijama polaznica/ka. Nadamo se da ćemo na ovaj način unijeti novu snagu u bh. aktivizam.

Više o feminističkoj školi saznajte na

www.soc.ba -> Programi -> Feministička škola Žarana Papić

Zagovaranje: prava LGBT osoba i žena

Tokom 2015. godine Sarajevski otvoreni centar, u saradnji sa partnerskim organizacijama i putem postojećih mreža, predložiće nekoliko konkretnih promjena, koje se odnose na: a) suzbijanje diskriminacije (izmjena zakona, izrada strategije za suzbijanje diskriminacije), b) učešće žena u politici (izmjene izbornog zakona, izmjene zakona o vladama na kantonálnom, entitetskom i državnom nivou), c) krivična djela počinjena iz mržnje (izmjene *Krivičnog zakona FBiH*, dopunu nastavnih planova policijskih akademija). Na taj način SOC nastavlja postojeće, ali i otpočinje nove zagovaračke inicijative, s ciljem da se unaprijedi odgovornost države kada su u pitanju ljudska prava manjinskih grupa.

Više o zagovaranju i zagovaračkim aktivnostima SOC-a saznajte na www.soc.ba -> Programi

Akademija ravnopravnosti

Svjesne/i da iza svake promjene stoje ljudi, odlučili/e smo se da intenziviramo svoju saradnju sa

novoizabranim, ali i budućim lidericama/ima. 2015. tako, na inicijativu naše partnerske Fondacije Friedrich Ebert, pokrećemo Akademiju ravnopravnosti. Na Akademiji, koja se sastoji od pet trodnevni modula, učestvovaće parlamentarke/ci državnog, entitetskih i kantonalnih parlamenata, predstavnice/i političkih stranaka i određenih političkih tijela, u nadi da će se tako izgraditi i/ili jačati saradnja između organizacija civilnog društva sa donositeljicama/ima odluka. Akademija se fokusira na pitanja ravnopravnosti spolova i pravima deprivilegovanih društvenih grupa (LGBT osobe, osobe sa invaliditetom, Romkinje/i, povratnice/i).

Više o Akademiji saznajte na

www.soc.ba -> Programi -> Akademiji ravnopravnosti

Osnajivanje LGBT zajednice: novi pristupi

Tokom 2015. nastavićemo svoj intenzivni rad sa LGBT osobama. Pored događaja za zajednicu i pravnog savjetovanja, Sarajevski otvoreni centar će omogućiti psihološko savjetovanje i pravno zastupanje (advokaticu) onim LGBT osobama kojima je ta vrsta podrške potrebna. Na taj način proširićemo svoj katalog servisa, u nadi da pratimo potrebe LGBT zajednice, a paralelno razvijamo nove metode osnaživanja. Poseban fokus 2015. biće trans* osobe, tako što ćemo pružati podršku trans grupi Trans*BiH, te provesti prvo istraživanje o potrebama trans* osoba u BiH.

Više o osnaživanju LGBT zajednice saznajte na

www.soc.ba -> Programi

DRUGI/E O NAMA



Sarajevski otvoreni centar je za kratko vrijeme postao prepoznatljiva i respektabilna organizacija u Bosni i Hercegovini. Pojava SOC-a u civilnom društvu unijela je svojevrsnu svježinu u rad organizacija civilnog društva. Svojim radom demonstriraju šta to znači biti transparentan i odgovoran. Jedna su od prvih organizacija u BiH koja je pitanje zaštite prava LGBT osoba iznijela u javni diskurs, argumentujući nezavidni položaj ove populacije konkretnim analizama i prijedlozima za unapredjenje stanja.

Dragana Dardić, Helsinški parlament građana Banja Luka

Već skoro pet godina sa SOC-om dijelimo stav da se proces demokratizacije bh. društva mora odvijati kroz postizanje ravnopravnosti svih njenih građana/ki, pa tako i marginaliziranih skupina. Cijenimo i podržavamo posvećenost SOC-ovih aktivista/ica ovom cilju, kao i njihov profesionalni pristup realizaciji akcija koji su da sada u javnosti ostavljali vidljiv trag i pokretali promjene.

Vesna Andree Zaimović, RadioSarajevo.ba



Svaki susret sa timom SOC-a za mene je izuzetno zadovoljstvo. Iako se najvjerovatnije radi o prosječno najmlađoj ekipi u civilnom sektoru u BiH, njihova profesionalnost, posvećenost i entuzijazam zaista plijene.

Dobrila Govedarica, Fond otvoreno društvo BiH

Iskustvo koje sam lično stekao u Sarajevskom otvorenom centru mi je uveliko pomogla da poboljšam i sebe i rad Banjalučkog udruženja kvir aktivista. Mišljenja sam da i druge organizacije, koje se bave ljudskim pravima, mogu dosta toga od SOC-a naučiti.

Jasenko Suljetović, Banjalučko udruženje kvir aktivista



TIM (stanje april 2015.)

Upravni odbor:
Aida Spahić, Elmaja Bavčić, Arijana Aganović

Izvršni direktor:
Saša Gavrić
Rukovoditeljica programa:
Emina Bošnjak

Finansijski/a i administrativni/a koordinator/ica:
Feđa Bobić, Dina Vilić

Programski/e koordinatori/ice:
Jozo Blažević, Jasmina Čaušević, Inela Hadžić, Lejla Huremović,
Naida Kučukalić, Dalila Mirović, Vladana Vasić
Programska asistentica: Maida Zagorac

Volonteri/ke:
Darko Pandurević

Kontakt:
Sarajevski otvoreni centar
Čekaluša 16
BiH-71 000 Sarajevo

tel: + 387 (33) 551 000 (programski tim)
+ 387 (33) 551 001 (rukovodstvo, finansije i administracija)
fax: + 387 (33) 551 002
www.soc.ba - office@soc.ba

www.lgbt.ba - www.zenskamreza.ba - www.eu-monitoring.ba

